

O'zbekiston Respublikasi Davlat aktivlarini boshqarish agentligi tizimida korrupsiyaviy xavf-xatarlarni baholash USLUBIYOTI

Mazkur Uslubiyot O'zbekiston Respublikasi Davlat aktivlarini boshqarish agentligi (keyingi o'rinlarda – Davlat aktivlari agentligi) faoliyatida korrupsiyaviy xavf-xatarlarni aniqlash va baholash tartibini belgilaydi.

1-bob. Umumiy qoidalar

1. Davlat aktivlari agentligining faoliyatidagi korrupsiyaviy xavf-xatarlarni aniqlash va baholashning maqsadlari quyidagilardan iborat:

Davlat aktivlari agentligining korrupsiyaviy xavf-xatarga eng ko'p duch keladigan vazifa va funksiyalarini aniqlash;

korrupsiyaviy xavf-xatar yuqori bo'lgan lavozimlar ro'yxatini shakllantirish;

korrupsiyaviy xavf-xatarlarni bartaraf etish bo'yicha chora-tadbirlarni ishlab chiqish.

2. Korrupsiyaviy xavf-xatarlarni aniqlash va baholash quyidagilar ishlab chiqilishini nazarda tutadi:

korrupsiyaviy xavf-xatarlar xaritasi;

korrupsiyaga qarshi kurashish bo'yicha dastur;

korrupsiyaviy xavf-xatar yuqori bo'lgan lavozimlar ro'yxati;

korrupsiyaga moyil bo'lgan munosabatlar elektron reyestri.

3. Ushbu Uslubiyotda quyidagi asosiy tushunchalar qo'llaniladi:

korrupsiyaviy xavf-xatar – shaxsning o'z mansab yoki xizmat mavqeidan shaxsiy manfaatlarini yoxud o'zga shaxslarning manfaatlarini ko'zlab moddiy yoki nomoddiy naf olish maqsadida qonunga xilof ravishda mavjud sabab va sharoitlarda korrupsiyaviy xatti-harakatlarni sodir etish ehtimoli;

korrupsiyaviy xavf-xatarlar xaritasi – Davlat aktivlari agentligi faoliyatida amalga oshiriladigan vazifa va funksiyalar (jarayonlar) bilan bog'liq yuzaga kelishi mumkin bo'lgan korrupsiyaviy xavf-xatarning tavsifi va darajasi, funksiyalarni (jarayonlarni) tartibga soluvchi mexanizmlar, funksiyalarni (jarayonlarni) amalga oshirishga mas'ul bo'lgan lavozim, korrupsiyaviy xavf-xatarlarni bartaraf etish choralari, qoldiq korrupsiyaviy xavf-xatar darajasi, korrupsiyaviy xavf-xatarni bartaraf etish choralari amalga oshirishga mas'ul ijrochilarni o'z ichiga olgan hujjat;

korrupsiyaga oid huquqbuzarlik – korrupsiya alomatlariga ega bo'lgan, sodir etilganligi uchun qonunchilikda javobgarlik nazarda tutilgan qilmish;

korrupsiyaviy xavf-xatarlarni baholash – Davlat aktivlari agentligining faoliyatini (vazifa va funksiyalarini) tahlil qilish, mavjud korrupsiyaviy xavf-xatarlarni aniqlash va ushbu xavf-xatarlar darajasini baholash bo'yicha faoliyat;

qoldiq xavf-xatar – aniqlangan korrupsiyaviy xavf-xatarni bartaraf etish yuzasidan belgilangan choradan keyin saqlanib qoladigan xavf-xatar;

maxsus bo‘linma – Davlat aktivlari agentligining Korrupsiyaga qarshi kurashish va komplayens bo‘limi;

ishchi guruh – Davlat aktivlari agentligi korrupsiyaviy xavf-xatarlarni baholash uchun tuziladigan xodimlar tarkibi.

4. Davlat aktivlari agentligi tomonidan korrupsiyaviy xavf-xatarlarni baholash har yili 1-martga qadar amalga oshiriladi.

Korrupsiyaviy xavf-xatarlarni baholash Davlat aktivlari agentligiga normativ-huquqiy hujjatlar bilan yuklatilgan funksiyalar doirasida amalga oshiriladi.

5. O‘zbekiston Respublikasi Korrupsiyaga qarshi kurashish agentligining (keyingi o‘rinlarda – Vakolatli organ) tomonidan Davlat aktivlari agentligining korrupsiyaviy xavf-xatarlarni baholash va bartaraf etish borasidagi faoliyatini takomillashtirish, ushbu yo‘nalishda kamchiliklarning oldini olish bo‘yicha ko‘rsatmalar berilishi mumkin.

6. Davlat aktivlari agentligining hududiy boshqarmalari faoliyatida korrupsiyaviy xavf-xatarlarni aniqlash va baholash Davlat aktivlari agentligining markaziy apparati tomonidan korrupsiyaviy xavf-xatarlarni aniqlash va baholash jarayonida ko‘rib chiqiladi.

7. Davlat aktivlari agentligining idoraviy mansub tuzilmalari o‘z faoliyatida korrupsiyaviy xavf-xatarlarni aniqlash va baholashni mustaqil ravishda amalga oshiradi.

Zaruriyatga ko‘ra, maxsus bo‘linma tomonidan Davlat aktivlari agentligining tizim tashkilotlariga mazkur yo‘nalishda tegishli ko‘rsatma va amaliy yordam ko‘rsatilishi mumkin.

2-bob. Korrupsiyaviy xavf-xatarlarni aniqlash va baholashni tashkil etish

8. Korrupsiyaviy xavf-xatarlarni aniqlash va baholash Davlat aktivlari agentligi markaziy apparatining barcha boshqarma va bo‘limlarini qamrab olishi lozim.

Bunda, korrupsiyaviy xavf-xatarlarni aniqlash va baholash maxsus bo‘linma tomonidan amalga oshiriladi.

9. Davlat aktivlari agentligi direktorining ko‘rsatmasiga ko‘ra, korrupsiyaviy xavf-xatarlarni aniqlash va baholash ishchi guruh tomonidan amalga oshirilishi mumkin.

10. Ishchi guruh a‘zolari Davlat aktivlari agentligining markaziy apparati tarkibiy bo‘linmlari mas’ul xodimlaridan iborat tarkibda tashkil etiladi.

Davlat aktivlari agentligi direktori tomonidan ishchi guruh tarkibi tasdiqlanadi hamda uning faoliyati muvofiqlashtiriladi.

11. Korrupsiyaviy xavf-xatarlarni aniqlash va baholashda maxsus bo‘linma va Ishchi guruh tomonidan quyidagi vazifalar amalga oshiriladi:

korrupsiyaviy xavf-xatarlarni aniqlash va baholash bo‘yicha ishlarni tashkil etish va muvofiqlashtirish;

Davlat aktivlari agentligining korrupsiyaviy xavf-xatarlar xaritasini ishlab chiqish;

Davlat aktivlari agentligining korrupsiyaga qarshi kurashish bo'yicha dastur loyihasini ishlab chiqish;

Davlat aktivlari agentligining idoraviy mansub tuzilmalari tomonidan ishlab chiqilgan korrupsiyaviy xavf-xatarlar xaritasi va korrupsiyaga qarshi kurashish bo'yicha dastur loyihalarini ko'rib chiqish va ularni takomillashtirish yuzasidan takliflar berish;

Vakolatli organ va jamoatchilik tomonidan berilgan takliflar asosida Davlat aktivlari agentligining korrupsiyaviy xavf-xatarlar xaritasini va korrupsiyaga qarshi kurashish bo'yicha dastur loyihasini takomillashtirish.

3-bob. Korrupsiyaviy xavf-xatarlarni aniqlash va baholash tartibi

12. Maxsus bo'linma (Ishchi guruh) tomonidan Davlat aktivlari agentligi faoliyatining (vazifa va funksiyalarining) tavsifi ushbu Uslubiyotning 1-ilovasiga muvofiq shaklda tuziladi.

13. Davlat aktivlari agentligi faoliyatidagi (vazifa va funksiyalardagi) korrupsiyaviy xavf-xatarlar ichki va tashqi axborot manbalari asosida aniqlanadi.

14. Ichki axborot manbalari quyidagilardan iborat:

Davlat aktivlari agentligi faoliyatining (vazifa va funksiyalarining) huquqiy asosi;

ichki tekshiruv materiallari, shu jumladan xizmat tekshiruvi materiallari;

odob-axloq komissiyasi majlislarining yig'ilish bayonnomalari;

korrupsiyaga qarshi kurashish ishlarining monitoring natijalari;

Maxsus bo'linma (Ishchi guruh) tomonidan Davlat aktivlari agentligi faoliyati (vazifa va funksiyalari) yuzasidan o'tkazilgan so'rovnomalar, shu jumladan sotsiologik tadqiqotlar natijalari va boshqalar.

15. Tashqi axborot manbalari quyidagilardan iborat:

Davlat aktivlari agentligi faoliyati bo'yicha huquqbuzarliklar to'g'risidagi murojaatlar (xabarlar) va statistik ma'lumotlar;

Davlat aktivlari agentligi yoki boshqa tashkilotlar tomonidan Davlat aktivlari agentligi faoliyati (vazifa va funksiyalari) yuzasidan o'tkazilgan so'rovnomalar, shu jumladan sotsiologik tadqiqotlar natijalari;

huquqni muhofaza qiluvchi organlar tomonidan taqdim etilgan materiallar va boshqalar.

16. Maxsus bo'linma (Ishchi guruh) tomonidan Davlat aktivlari agentligining faoliyatidagi (vazifa va funksiyalaridagi) korrupsiyaviy xavf-xatarlarni aniqlashda quyidagi holatlar tahlil qilinadi:

Davlat aktivlari agentligining xodimi tomonidan sodir etilgan korrupsiyaga oid huquqbuzarlik;

Davlat aktivlari agentligi tomonidan faoliyatini (vazifa va funksiyalarini) amalga oshirishda jismoniy va yuridik shaxslar uchun sun'iy to'siqlarning mavjudligi;

o'z vaqtida qaror qabul qilmaslik, asossiz tezkor tartibda qaror qabul qilish;

hujjatlar, elektron ma'lumotlar bazalariga bila turib yolg'on ma'lumotlarning kiritilishi;

xizmat vakolatlarini amalga oshirishda manfaatlar to'qnashuvi;

vakolatlarni amalga oshirishda mahalliychilik, homiylik, urug'-aymoqchilik kabi holatlarning mavjudligi.

17. Davlat aktivlari agentligi faoliyatidagi (vazifa va funksiyalaridagi) korrupsiyaviy xavf- xatarlarning darajasi quyidagi o'lchovlarda baholanadi:

past;

o'rta;

yuqori.

18. Maxsus bo'linma (Ishchi guruh) tomonidan korrupsiyaviy xavf-xatar darajasiga baho berish mazkur Uslubiyotga 2-ilovada belgilangan mezonlar asosida amalga oshiriladi.

4-bob. Korrupsiyaviy xavf-xatarlarning darajasini bartaraf etish choralari

19. Korrupsiyaviy xavf-xatarlarni bartaraf etish choralari quyidagi shakllarda amalga oshirilishi mumkin:

normativ-huquqiy hujjatlar hamda ichki idoraviy hujjatlar loyihalarini ishlab chiqish;

inson omilini qisqartirish va Davlat aktivlari agentligi faoliyatini (vazifa va funksiyalarini) raqamlashtirish;

Davlat aktivlari agentligi faoliyatini (vazifa va funksiyalarini) amalga oshirishda shaffoflikni ta'minlash, jamoatchilik nazoratini yo'lga qo'yish;

Davlat aktivlari agentligi faoliyatini (vazifa va funksiyalarini) tartibga solish choralari ko'rish;

Davlat aktivlari agentligi xodimlari va jismoniy shaxslar o'rtasida to'g'ridan-to'g'ri aloqani maksimal darajada cheklash;

rasmiy veb-sayt va boshqa ommaviy axborot vositalarida Davlat aktivlari agentligi tomonidan amalga oshirilayotgan davlat xaridlari to'g'risidagi ma'lumotlarni joylashtirish va tarqatish;

davlat xizmatlarini ko'rsatish jarayonini soddalashtirish, asossiz cheklovlarni, ortiqcha ma'muriy tartib-taomillarni bekor qilish, byurokratik tartibga solish mexanizmlarini yo'q qilish, taqdim etilgan hujjatlar soni va qaror qabul qilish muddatlarini qisqartirish;

Davlat aktivlari agentligi tomonidan korrupsiyaga qarshi kurashishga qaratilgan tushuntirish ishlarini amalga oshirish, profilaktik suhbatlar o'tkazish, ishonch telefoni va boshqa aloqa kanallarida targ'ibot ishlarini amalga oshirish;

xodimlarning korrupsiyaga qarshi kurashish va manfaatlar to'qnashuvini boshqarish bo'yicha ichki hujjatlarga har kuni, o'zaro va to'liq rioya qilishlarini nazorat qilish;

xodimlarning korrupsiyaga qarshi kurashish va manfaatlar to'qnashuvini boshqarish bo'yicha bilim malakasini oshirish.

Davlat aktivlari agentligi korrupsiyaviy xavf-xatarlarni bartaraf etish bo'yicha qonunchilik hujjatlariga zid bo'lmagan boshqa chora-tadbirlarni ham amalga oshirishi mumkin.

20. Korrupsiyaviy xavf-xatarlarni bartaraf etish bo'yicha mazkur Uslubiyotning 18-bandida belgilangan choralardan kelib chiqib, qoldiq xavf-xatar darajasini baholash mazkur Uslubiyotning 2-ilovasidagi mezonlar asosida amalga oshiriladi.

21. Maxsus bo'linma (Ishchi guruhi) tomonidan mazkur Uslubiyotning 3-ilovasiga muvofiq shaklda korrupsiyaviy xavf-xatarlar xaritasi loyihasi ishlab chiqiladi.

22. Davlat aktivlari agentligining idoraviy mansub tuzilmalari tomonidan ushbu Uslubiyotning 3-ilovasiga muvofiq shaklda korrupsiyaviy xavf-xatarlar xaritasi loyihalari va mazkur Uslubiyotning 4-ilovasiga muvofiq shaklda korrupsiyaga qarshi kurashish bo'yicha dastur loyihalarini tayyorlanadi.

Bunda, mazkur loyihalar maxsus bo'linma (Ishchi guruhi)ga ko'rib chiqish uchun taqdim qilinadi.

23. Maxsus bo'linma (Ishchi guruhi) tomonidan Davlat aktivlari agentligi faoliyatidagi (vazifa va funksiyalaridagi) korrupsiyaviy xavf-xatarlarni aniqlash va baholash natijalari asosida Davlat aktivlari agentligining korrupsiyaviy xavf-xatarlar xaritasi ishlab chiqiladi va Vakolat organning "E-anticor.uz" elektron platformasiga har yili 1-fevralga qadar kiritiladi.

24. Maxsus bo'linma (Ishchi guruhi) tomonidan "E-anticor.uz" elektron platformasida joylashtirilgan korrupsiyaviy xavf-xatarlar xaritasiga asosan quyidagi hujjatlar shakllantiriladi:

Davlat aktivlari agentligining korrupsiyaga qarshi kurashish bo'yicha dasturi;

Davlat aktivlari agentligining korrupsiyaviy xavf-xatari yuqori bo'lgan lavozimlari ro'yxati.

5-bob. Korrupsiyaga moyil bo'lgan munosabatlar elektron reyestrini shakllantirish va yuritish tartibi

25. Vakolatli organ tomonidan "E-anticor.uz" elektron platformasida joylashtirilgan Davlat aktivlari agentligining korrupsiyaviy xavf-xatarlar xaritasi loyihalari asosida avtomatik ravishda korrupsiyaga moyil bo'lgan munosabatlar elektron reyestri shakllantiriladi.

26. Korrupsiyaga moyil bo'lgan munosabatlar elektron reyestri loyihasi Vakolat organ tomonidan jamoatchilik muhokamasidan o'tkazish uchun o'n besh kundan kam bo'lmagan muddatga "E-anticor.uz" veb-saytiga joylashtiriladi.

27. Vakolatli organ jamoatchilik muhokamasi natijalari bo'yicha umumlashtirilgan takliflarni (mavjud bo'lganda) muhokama yakunlangandan keyin "E-anticor.uz" elektron platformasi orqali Davlat aktivlari agentligika yuboradi.

28. Maxsus bo'linma (Ishchi guruhi) Vakolat organ va jamoatchilik tomonidan berilgan takliflar asosida Davlat aktivlari agentligining korrupsiyaviy xavf-xatarlar xaritasi hamda korrupsiyaga qarshi kurashish bo'yicha dasturi loyihalarini takomillashtiradi.

29. Davlat aktivlari agentligi direktori har yili 1-martga qadar korrupsiyaviy xavf- xatarlar xaritasi hamda korrupsiyaga qarshi kurashish bo'yicha dasturini "E-anticor.uz" elektron platformasi orqali tasdiqlaydi.

Mazkur muddat Vakolatli organ tomonidan takliflar taqdim etilishiga ko'ra o'zgartirilishi mumkin.

6-bob. Yakuniy qoidalar

30. Ushbu Uslubiyot O'zbekiston Respublikasi qonunchiligi o'zgargan taqdirda yoki Davlat aktivlari agentligining korrupsiyaviy xavf-xatarlar xaritasini tuzish jarayonini takomillashtirish zarurati tug'ilganda qayta ko'rib chiqiladi va o'zgartiriladi.

31. Mazkur Uslubiyot talablari buzilishida aybdor bo'lgan shaxslar qonunchilik hujjatlarida belgilangan tartibda javobgar bo'ladi.

**Davlat aktivlari agentligi faoliyatining (vazifa va funksiyalarining)
TAVSIFI**

T/r	Funksiya nomlanishi	Funksiya doirasida bajariladigan jarayon	Jarayonlarni amalga oshirish uchun javobgar tarkibiy bo'linma va (yoki) hududiy boshqarma hamda lavozimlar nomi
1. O'zbekiston Respublikasi Davlat aktivlarini boshqarish agentligi			
1.1. Tarkibiy bo'linma va (yoki) hududiy boshqarma			
1.1.1.			

Korrupsiyaviy xavf-xatar darajasiga baho berish bo'yicha MEZONLAR

Korrupsiyaviy xavf-xatar darajasi	Mezonlar
Yuqori*	Davlat aktivlari agentligi faoliyati (vazifa va funksiyasi) avtomatlashtirilmagan
	Davlat aktivlari agentligi faoliyati (vazifa va funksiyasi) tartibga solinmagan
	Nazoratsiz tartibda ish joyida jismoniy yoki yuridik shaxslar bilan to'g'ridan-to'g'ri aloqa qilish imkoniyati mavjud
	Davlat aktivlari agentligi faoliyati (vazifa va funksiya) doirasida qarorni loyihasini tayyorlashda, ko'rib chiqishda va qabul qilishda bir shaxs ishtirok etishi
	Davlat aktivlari agentligi faoliyatini (vazifa va funksiyani) bajarishda korrupsiyaviy xatti-harakat sodir etilgan (jinoyat sodir etilganligi sud tomonidan tasdiqlangan)
O'rta*	Davlat aktivlari agentligi faoliyati (vazifa va funksiyasi) qisman avtomatlashtirilgan
	Davlat aktivlari agentligi faoliyati (vazifa va funksiyasi) qisman tartibga solingan
	Nazorat tartibida ish joyida jismoniy yoki yuridik shaxslar bilan to'g'ridan-to'g'ri aloqa qilish imkoniyati mavjud
	Davlat aktivlari agentligi faoliyatini (vazifa va funksiyani) doirasida qarorni loyihasini tayyorlashda, ko'rib chiqishda va qabul qilishda ikkita shaxs ishtirok etishi
	Davlat aktivlari agentligi faoliyati (vazifa va funksiyasi) bajarishda korrupsiyaviy xatti-harakat sodir etilganligi to'g'risidagi ma'lumot mavjud (jinoyat sodir etilganligi sud tomonidan tasdiqlanmagan)
Past†	Davlat aktivlari agentligi faoliyati (vazifa va funksiyasi) to'liq avtomatlashtirilgan
	Davlat aktivlari agentligi faoliyati (vazifa va funksiyasi) to'liq tartibga solingan
	jismoniy yoki yuridik shaxslar bilan to'g'ridan-to'g'ri aloqa qilish imkoniyati mavjud emas
	Davlat aktivlari agentligi faoliyati (vazifa va funksiyasi) doirasida qarorni loyihasini tayyorlashda, ko'rib chiqishda va qabul qilishda uch va undan ortiq shaxs ishtirok etishi

korrupsiyaviy xatti-harakat va korrupsiyaviy xatti-harakat sodir etilganligi to'g'risidagi ma'lumotlar mavjud emas

* Maxsus bo'linma (Ishchi guruh) tomonidan Davlat aktivlari agentligi faoliyatida (vazifa va funksiyasida) aniqlangan xavf-xatarning "Yuqori" yoki "O'rta" darajada deb baholash Vazir bilan kelishgan holda amalga oshiriladi.

** Davlat aktivlari agentligi faoliyatida (vazifa va funksiyasida) aniqlangan korrupsiyaviy xavf-xatar darajasini baholashda, agarda "Past" darajadagi mezonlarning biri mavjud bo'lsa, o'sha korrupsiyaviy xavf-xatar darajasi past darajada deb baholanadi.

O'zbekiston Respublikasi Davlat aktivlarini boshqarish agentligi
tizimida korrupsiyaviy xavf-xatarlarni baholash uslubiyotiga
3-ilova

“TASDIQLAYMAN”
Davlat aktivlari agentligi tizimi tashkiloti
rahbari

_____ **F.I.Sh**
____-____ 20__-yil

_____ faoliyatidagi korrupsiyaviy xavf-xatarlarning
XARITASI

T/r	Korrupsiyaviy xavf-xatarning tavsifi	Korrupsiyaviy xavf-xatarning darajasi (past, o'rta, yuqori)	Funksiyalarni (jarayonlarni) amalga oshirishga mas'ul bo'lgan lavozim	Funksiyalarni (jarayonlarni) tartibga soluvchi mexanizm	Korrupsiyaviy xavf- xatarlarni bartaraf etish choralari	Qoldiq korrupsiyaviy xavf-xatar darajasi (past, o'rta, yuqori)	Mas'ul ijrochilar
	1. Tarkibiy bo'linmaning nomi*						
1.	Funksiya nomi						
	Funksiyaga oid munosabat nomi						
	Jarayon nomi						
...							

O'zbekiston Respublikasi Davlat aktivlarini boshqarish agentligi
tizimida korrupsiyaviy xavf-xatarlarni baholash uslubiyotiga
4-ilova

_____ning korrupsiyaga qarshi kurashish
DASTURI

T/r	Korrupsiyaviy xavf-xatarlarni bartaraf etish chora-tadbirlari	Amalga oshirish mexanizmi	Ijro muddati	Ijro uchun mas'ullar
1.				
2.				
...				